

Die Leischewach

De alte Müller hot de Schlach getroffen.
er stäiht am Kerchhof un so in Sarch is offe.
Sou is es Brauch, daß mer den doute Mann
bevor mer'n oigräbt, nochmol säihe kann.

Soi Fraa, die Marie awwer jammert schwer:
"Wou bring ich nur en Leischewächter her?
Der's immer mächt, der gute Hannes Maier
hot selwer Fieber. S'is em nit geheier.
Der kann unmöglich uff de Kerchhof naus."
Sou licht ihr'n Max allä im Leichehaus.
Hockt sich denn känner zu ihm brave Mann?
Da kimmt de Lehrer. Un den fleht se a:
„Moin Max wor doch de beste Mann de Welt
un nun is kanner, wo ihm Leichwach hält.“
Der Lehrer sächt: Die Marie soll nit flenne,
er det mol niwwer glei ins Schulhaus renne,
vielleicht, daß äner von de Buweklaß
am Leichewachehalte hätt so in Spaß.
"Horscht zu, ihr Buwe, wer hot von Eich Schneid?
Wer dud von Eich glei nach de Mittachszeit
zum doute Müller uff de Kerchhof wetze
un sich zu ihm als Leichewächter setze?"
De Sepp werd rout bis hinner soi zwä Ohrn,
de Willi dut in soine Nose bohrn.
De Franz dut ogestrengt zum Fenster schiele,
es Karlche dut mit soine Klicker spiele.
Un sou is alles mucksmäusje still
weil kanner Leichewärter mache will.
"Seid Ihr so feich?" frächt laut de Lehrer jetzt.
Da fiehlt es kloine Fritzje sich verletzt.
En Feichling wor er nie. Schon rief er aus:
" Herr Lehrer, abgemacht! Ich geh schon naus!"
" Ein Held bist du", sächt do de Lehrer druff.
" Geh no glei häm. Heit kriegste ach nix uff."

Doch später denkt der Lehrer: Potzderdaus!
Geht der Bu wirklich uff de Kerchhof naus?
Wos is, wenn der dut plötzlich Angst verspiern?
Ich män, ich werd mol besser kontrolliern.
Der Lehrer hot sich hinnerm Sarch versteckt
un mit em schwarze Tuch gonz zugedeckt.
Doch kaum schlächts äns, do kimmt de Fritz gelaafe.
Er guckt den Müller o mit grouße Aache.
Dann zieht er sich gonz noh en Stuhl herbei.
Er hockt sich druff un liest in em Karl May.
Der Lehrer denkt: Des is zum Hoorn-Ausreiße.
En annern Bu dät in soi Hose schei.....
Mit tiefer Stimme hinterm Sarch er spricht:
"Wenn man Leichewache hält, dann liest man nicht!"
Der Fritz, der haut soi Buch laut uff die Erd
un sächt zu sich: "Do wärd moi Flasch geleert!"
Er säuft un schmatzt un sächt vergniglich laut:
"Ob wohl de Vadder schon gemerkt, daß ich soi Bier geklaut?"
Der Lehrer denkt: wie kann's dem Kerl nur schmecke?
Jetzt äwwer werd ich richtig ihn erschrecke.
Noch tiefer is soi Stimm, wie er jetzt spricht:
"Wenn man Leichewache hält, dann trinkt man nicht!"
Der Fritz der knallt die Flasche uff de Rase
un wischt sich ab de Schaum von Maul un Nose.
Jetzt issen Ringel Fleischworscht an de Reih.
Wos hot der Kerl denn alles noch debei?
Der Lehrer jetzt mit Grabesstimme spricht:
Wenn man Leischewache hält, dann ißt man nicht!
Do longt's dem Fritz. Jetzt is es em genuch.
Er packt soi Worscht oi un dezu soi Buch,
springt uff und greicht: "Du alter Schockelgaul,
horch, wenn mer dout is, do hält mer soi Maul."

